

Kanuni Hazipaswi Kuondolewa ili Kupata Amani

Amani nawaachieni; amani yangu nawapa; niwapavyo mimi sivyo kama ulimwengu utoavyo. Msifadhaike mioyoni mwenu, wala msiwe na woga—**Yohana 14:27.**

Daima kumekuwa na kutaendelea kuwa na makundi mawili duniani hata mwisho wa wakati—wamwaminio Yesu na wale wanaomkataa. Wenye dhambi, hata wakiwa wabaya kiasi gani, wachukizao na waovu, wakimwamini Yesu watatakaswa na kufanywa kuwa safi, kwa njia ya kuliishi Neno Lake.... Wale wanaomkataa Yesu na kukataa kuuamini ukweli watajawa na chuki dhidi ya wale ambao wamemkubali Yesu kuwa Mwokozi wao binafsi. Lakini wale wanaompokea Yesu wanabadilishwa na kutiishwa na udhihirisho wa upendo Wake na unyenyekevu Wake, mateso na kifo kwa niaba yao....

Amani ambayo Yesu aliwapatia wanafunzi Wake na ambayo tunaomba, ni amani inayozalishwa na ukweli, amani ambayo haiwezi kuzimishwa na utangano. Nje kunaweza kuwa na vita na mapigano, wivu, husuda, chuki, ugomvi; lakini amani atoayo Yesu sio ile ambayo ulimwengu unaweza kuitoa au kuiondoa. Inaweza kustahimili katikati ya uwindaji wa majasusi na upinzani mkali wa adui wa Yesu.... Yesu hakutafuta hata mara moja kununua amani kwa usaliti wa amana takatifu. Amani haiwezi kuletwa kwa kushusha viwango vya kanuni.... Ni kosa kubwa sana kwa upande wa walio wana wa Mungu kutafuta kuondoa utangano ule unaowatenga wana wa nuru kutoka kwa wana wa giza kwa kupindisha kanuni na kwa kuuweka chini ukweli. Ingekuwa ni kuisalimisha amani ya Kristo ili kupata amani au kuafikiana na ulimwengu. Kafara hiyo ni ya gharama mno kufanywa na wana wa Mungu kutafuta kuwa na amani na ulimwengu kwa kuziacha kanuni za ukweli.... Hivyo basi hebu wafuasi wa Yesu waweke hili akilini mwao kwamba hawatashusha viwango vya ukweli, kamwe wasiondoe yodi moja ya kanuni kwa ajili ya kuupendeza ulimwengu. Hebu na wasimame imara katika amani ya Yesu Kristo.